

MATAUPU VASEGA LAITI **AUKUSO – TESEMA 2026**

ASO

MATAUPU

TUSI FAITAU

MANATU AUTU O AOKUSO: O LE LAUGA A IESU I LUGA O LE MAUGA

1.AOKUSO 02	“AMUIA E MATITIVA I LE AGAGA, AUA E O LATOU LE MALO O LE ATUA”	MATAIO 5:1 – 3
2.AOKUSO 09	“AMUIA E FA’ANOANO, AUA E FA’AMAFANAFANAINA I LATOU”	MATAIO 5: 4
3.AOKUSO 16	“AMUIA E AGAMALU, AUA E FAI MO LATOU TOFI LE NUU”	MATAIO 5: 5
4.AOKUSO 23	“AMUIA E FIA AAI MA FIA INU I LE AMIOTONU, AUA E MAOONA I LATOU”	MATAIO 5: 6
5.AOKUSO 30	“MATAUPU FA’AMANATU”	FESILI MA TALI

MANATU AUTU SETEMA: O LE LAUGA A IESU I LUGA O LE MAUGA (FA’AAUAU)

6.SETEMA 06	“AMUIA E ALOLOFA ATU, AUA E ALOFAINA MAI I LATOU”	MATAIO 5: 7
7.SETEMA 13	“AMUIA E LOTO MAMA, AUA LATOU TE ILOA ATU LE ATUA”	MATAIO 5: 8
8.SETEMA 20	“AMUIA E FAATUPUINA LE FILEMU, AUA E TAUA I LATOU O ATALII O LE ATUA”	MATAIO 5: 9
9.SETEMA 27	“MATAUPU FA’AMANATU”	FESILI MA TALI

OKETOPA 04 2026 – OKETOPA 25 2026 “TAPENAGA & MALOLOGA LOTU TAMAITI”

MANATU AUTU NOVEMA : O LE LAUGA A IESU I LUGA O LE MAUGA (FA’AAUAU)

10.NOVEMA 01	“AMUIA E SAUAINA ONA O LE AMIOTONU, AUA E O LATOU LE MALO O LE ATUA”	MATAIO 5: 10
11. NOVEMA 08	“AMUIA OUTOU PEA LATOU UPU LEAGA, MA FAASAUA IA TE OUTOU, MA LATOU TUUAIINA PEPELO OUTOU I MEALEAGA UMA ONA O AU”	MATAIO 5: 11
12.NOVEMA 15	“IA OUTOU OLIOLI MA FIAFIA LAVA, AUA O I LE LAGI LO OUTOU TAUI E TELE...”	MATAIO 5: 12
13. NOVEMA 22	“IA PUPULA ATU LO OUTOU MALAMALAMA I LUMA O TAGATA”	MATAIO 5: 14 – 16
14. NOVEMA 29	“MATAUPU FA’AMANATU”	FESILI MA TALI
15. TESEMA 06	“TAPENAGA O LE ATIVENI	
16.TESEMA 13	“ATIVENI”	
17.TESEMA 20	SUEGA FA’AIU O LE TAUSAGA MA TUUA AI LE AOGA ASO SA 2026	

ASO SA – AUKUSO 02, 2026

MATAUPU – AMUIA E MATITIVA I LE AGAGA AUĀ E Ō LATOU LE MALO O LE LAGI

TUSI FAITAU – MATAIO 5:1-3

SINI – Ia malamalama fanau i le taua o le faamanuia a Iesu i lana fanau.

FESOASOANI MO FAIAOGA: E ofo alofa ma faatalofa atu, ia outou susuga i Faiaoga, i lenei foi vaiseuga o le tausaga. Malo le soifua malo le lagi-matafi i le alofa ma le agalelei tausua atu o le Atua i lo outou soifua ma lo matou ola. E iai le talitonuga, o lea ua ma'ea atu le pisi sa outou feagai ai ma le tatou fonotele faale-tausaga i le masina ua mavae atu. Malo le onosai faafetai le tapuai. Manatu ua lava foi se malologa aua se faasiliga-malosi e amata ai faiva o lenei afa-mulimuli o le tausaga. Ia e iai lava le talitonuga, o le ulua'i Aso Sa lenei, e manaia ae tatou amata foi i ni nai pesepesega e tatala ai lagona ma loto o nai fanau, e faigofie ai ona faasoa atu la tatou pitolaau, mo lesona ua fuafuaina lenei afa tausaga. O le mataupu mo lenei taeao, "Amuia e matitiva i le agaga auā e o latou le malo o le lagi". Ua iai le manatu, ua na o sina amataga lava e tatala ai la tatou mataupu o lenei taeao, ae taoto atu ia outou susuga le atoaga, e fua lava i nai fanau o loo outou mafuta. Ia manuia tele le faasoa mo le lesona o lenei taeao. God Bless!

FESOASOANI MO LE MATAUPU: Talofa tamaiti. O a mai outou i le uluai aso sa o lenei tauasaga aoga ua amatalia. Lelei tele tatou. O le tatou Lesona o lenei Aso Sa, "**Amuia e matitiva i le agaga, auā e o latou le malo o le lagi**" **BLESSED ARE THE POOR IN SPIRIT, FOR THEIRS IN THE KINGDOM OF HEAVEN.** O saunoaga ma upu ia a Iesu le Alii Faaola, ma lana faa'amuia muamua lea i lana lauga i luga o le mauga mo e matitiva i le agaga. Fai mai Iesu "**Amuia e matitiva i le agaga, aua e o latou le malo o le lagi**". O le uiga o le upu "matitiva i le agaga," atonu na fetalai Iesu e uiga i lo tatou tulaga faaleagaga o le mativa- o le amanaiaina o lo tatou manaomia mo le Atua. "O le malo o le lagi" e faatatau lea i tagata e amana'ia le Atua o lo latou Tupu. Ioe fanau i lenei taeao fou, taua tele le faamanatu lea a Iesu mo i tatou uma. "Amuia i latou e fa'aalia ma le lotomauualalo o latou mana'oga mo le Atua, aua latou te ulu atu i lona malo e faavavau." O le faamanuia a Iesu i le tagata ua mafatia, ma ua leai lava se faamoemoe o iai. O le mativa i le agaga e lē o le fa'amoemoe i le poto ma le malosi o le tagata, a'o le fa'alagolago ma le tu'uina atu i le Atua o lo outou soifua ma lo tatou ola. O le tatou iloa ma le mautinoa o le Atua, e atagia ai lo tatou le matitiva i le agaga, o a faafitauli e feagai pea ma tatou le fanau, ia tatou lototetele ma faatuatua i le Atua. O Ia lava na te faatumuina lo tatou matitiva faaleagaga, ina ia fai i tatou ma fanau o lona

malo e faavavau. Ia manuia outou le fanau ma ia faatumuina outou i le Agaga Paia o le Atua e tatou te le toe matitiva ai i le agaga e faavavau.



GALUEGA FA'ATINO

1. Tusi i se pepa le upu mativa, po o le matitiva e faigofie ai ona faaleo
2. Faasoa i upu ma lona uiga i le tusi faitau—mativa o lona uiga ua leai se mea, poo le gaogao
3. Saunia ni ata e faailoa atu ai o Iesu o loo lauga i luga o le mauga i tagata, ma valivali ai.

TAULOTO: Amuia e matitiva i le agaga, auā e ō latou le malo o le lagi.

A'OA'OGA:

1. Ua na o le Atua tatou te manuia ai i le tino, mafaufau, ma le agaga.
2. Tatou te le matitiva i se mea pe a tatou alolofa i le Atua.
3. Ia tatou fiafia ia Iesu ma alolofa ia te ia.

PESE: WHO IS THE KING OF THE JUNGLE,
WHO IS THE KING OF THE SEA,
WHO IS THE KING OF THE UNIVERSE
THE JUNGLE AND THE SEA

MANUIA TAPENAGA O LENEI ASO SA

ASO SA – AUKUSO 09, 2026

MATAUPU – “AMUIA Ë FA’ANOANO, AUĀ E FA’AMAFANAFANINA I LATOU.”

TUSI FAITAU – MATAIO 5:4

SINI –Ia malamalama le fanau e le tu’ulafoaiina e le Atua lana fanau e fa’anoanoa ma mafatia.

FESOASOANI MO LE FAIAOGA: Fa’atalofa ma faafeiloai atu ia outou susuga i Faiaoga i lenei Aso Sa manuia. Malo le tauata’i ma le onosai i le galuega ua valaauina ai lo tatou ola mo nai fanau a le ekalesia. E momoli atu le agaga-faafetai tele i lena Aso Sa ua mavae atu. Faafetai ia outou tapenaga mo lesona a nai fanau. Manatu o lo’o fa’aauauina lava le lauga a Iesu i luga o le mauga. E manaomia pea, toe faamanatu o lesona ua tuanai atu, ina ia mafai lava e le fanau ona latou taulotoina le lauga fa’aamuia a Iesu, ma ia latou malamalama i le uiga loloto o upu ma ia a’oa’oina ai i latou ia mauaa i o latou loto ma mafaufau. Ia manatua e a outou susuga, e taua tele la tatou su’esu’ega ina ia o faatasi a tatou mataupu ma le malamalama o nai fanau e tusa o lesona ua fuafuaina mo latou. Ua na o se amataga foi e tatala ai la tatou tapenaga, ae taoto atu ia outou susuga mo le faalauteleina mo nai fanau o loo outou mafuta. Manuia tapenaga uma mo lenei Aso Sa.

FESOASOANI MO LE MATAUPU: Talofa fanau. O a mai outou i lenei taeao? O ai la se isi na te manatuaina le tatou lesona i le Aso Sa ua tuanai atu. Ioe, lelei tele tatou. Sa tatou talanoa i le Aso Sa ua mavae atu i le fa’aamuia a Iesu. *“Amuia e matitiva i le agaga, aua e o latou le malo o le lagi”*. Peitai, o le Aso Sa lenei, lea o loo faaauauina ai lava le lauga a Iesu i luga o le mauga. O le lolofi ane la o tagata e toatele sa mulimuli ia Iesu, fa’atasi ma isi tagata mai ‘aai eseese. O tagata mafatia, o tagata mama’i, o i latou ia sa fia maua se mapusaga ma se faamalologa mai faafitauli sa feagai ma i latou. A’o le vaega tonu la lea ua faamamafa e Iesu i lana a’oa’oga, o lana faamanuia, ma lana fa’aamuia lona lua lenei. **“Amuia e fa’anoanoa auā e faamafanafanina i latou.”** (BLESSED ARE THOSE WHO MOURN FOR THEY WILL BE COMFORTED.) O lana folafolaga mo i latou ua maua i tigā ma mafatiaga o le olaga, ma faanoanoa ai, ua ia faailoa mai lava e mafuta mai pea le Alii, ma e auai pea lona Agaga e faamafanafana ma faalototele i le tagata. O lana fa’amalosiau ina ia tumau pea le fa’amoemoe ma le fa’atuatua o le tagata ia Iesu.. Silafia lelei e Iesu, e feagai pea le tagata ma faigata o le soifuaga. Peitai, ua ia fa’amanuia mai, pe a oo mai o aso lē faigofie, e le mafai lava ona ia alu ese ma le tagata. E maua le filemu moni i le Alii, pe afai tatou te tigā pea i le ola nei. Fai mai Iesu.

Amuia e faanoanoa, aua o le a faamafanafanaina i latou. Ioe fanau, a oo mai faanoanoaga o le ola nei, ia tatou faatuatua ma talitonu ia Iesu, o Ia lava e na te faamafanafanina i tatou uma e ala i

lona alofa tunoa e faavavau. Ia avea i tatou ma fanau e faamafanafanaina e le Atua, pe a oo mai faanoanoaga o le olaga. Ia manuia outou le fanau.

GALUEGA FAATINO: Uiga o Upu

1. Faamatala le faanoanoa ma le faamafanafana i se uiga faigofie
 1. *Faanoanoa – e leai se fiafia, ua le fia tautala, e oo lava foi ina tagi ai.*
 2. *Faamafanafana – ua maua fiafia i le loto ma le mafaufau, ua uma le tagi, ua maua le lototele*

TAULOTO: *“Amuia e faanoanoa aua e faamafanafanaina i latou” (BLESSED ARE THOSE WHO MOURN, FOR THEY WILL BE COMFORTED)*

A’OA’OGA:

1. E le tu’ulafoaina i tatou e le Atua pe a tatou faanoanoa
2. E faatasi mai pea le Atua ia i tatou i taimi uma, (faanoanoa poo le fiafia)
3. O le faamafanafanaga sili e maua ia Iesu.

FAAMA’EA LE LESONA: TATALO

MANUIA LE ASO SA

ASO SA – AOKUSO 16, 2026

MATAUPU: “AMUIA E AGAMALU, AUA E FAI MO LATOU TOFI LE NUU”

TUSI FAITAU: MATAIO 5:5

SINI –Ia malamalama ma iloa e fanau le uiga o le tagata agamalu.

FESOASOANI MO LE FAIAOGA: E ofo alofa ma faatalofa atu ia outou susuga i Faiaoga. Malo le soifua manuia, malo le pale ma le onosai, i tiute ma faiva o lenei vaiaso. E tuuina atu pea le agaga faafetai ona o galuega o le Aso Sa ua mavae atu. E iai lava le manatu e fia faaauauina pea le lauga fa’aamuia a Iesu i luga o le mauga, ina ia iloa ma taulotoina e fanau vaega uma o Fa’a-amuia a Iesu lea na talanoa ai i le motu o tagata. O le vaega lona tolu lea ua tatou talanoaina i lenei Aso Sa. **“Amuia e agamalu aua e fai mo latou le tofi o le nuu”** Manaia foi ae fai ni nai fesili i fanau, e amata ai le tatou lesona, fesili mo lesona ua tuanai atu, e faigofie ai foi le fa’aauauina o le tatou lesona mo lenei Aso Sa. Manatu lava ua na o se amataga foi e tatala ai la outou suesuega, ae ua tuuina atu lava ia outou susuga le atoa, mo la tatou lesona mo nai fanau o

loo outou mafuta, ina ia fua iai tapenaga uma. Ia faamanuia atu le Atua i tapenaga uma o lenei Aso Sa.

FESOASOANI MO LE MATAUPU: Talofa fanau. O a mai outou i lenei taeao? Viia le Atua i lana tausiga filemu ua tatou maua ai le ola ma le malosi i aso uma o lo tatou ola. I le fuaiupu e lima e pei ona aumaia e Mataio i le taeao lenei, lea lava o loo faaauauina mai ai le lauga fa'aamuia a Iesu i luga o le mauga. A'o le vaega e tolu lea ua fa'amamafa e Iesu e fai ma faamanatu mai mo tatou le fanau le soifuaga e tatau ona tatou ola ai. Fai mai Iesu **“Amuia e agamalu aua e fai mo latou le tofi o le nuu”** o le upu “agamalu” e mafua mai i le aga a le tagata poo lana amio o lo'o ola ai. O lona uiga o le agamalu, e maua e le tagata i le lotomauualalo, e le ola fa'amaualuga, e le ulavale pe mimita, o le tagata e malu ana aga, e iloa i lana savali ma lana tautala, o lana nofo e atagia i ona uiga le loto mauualalo ma le agamalu. O le uiga na o le upu agamalu o loo aumaia i le fuaiupu lea na tatou taulotoina, o le tagata ua maua le agamalu e gaua'i ai i se mea lelei e tatau ona fai. Fai mai Iesu o i latou ia, e maua le fa'amanuiaga ua foa'i atu e le Atua i le tagata agamalu ma le lotomauualalo. Ua ofoina mai e Iesu le nuu e fai mona tofi. O le fa'amanuiaga lenei, pe afai e ola le tagata e tusa ma lana faaamuia. Ua fa'alauaitele mai e Iesu ana a'oa'oga mo tatou uma, pe afai tatou te usiusita'i ma mulimulita'i i ai. Ioe fanau, amuia i tatou pe afai tatou maua le agamalu, aua e fai mo i tatou le tofi o le nuu. Ia manuia tele outou le fanau, ia fai outou ma faataitaiga o Iesu, aua o Ia lava le e agamalu ma le lotomauualalo e faavavau.

GALUEGA FAATINO:

1. Ia tauloto faatasi le fuaiupu o le lauga a Iesu
2. Faasoa ma fanau i le uiga o le upu AGAMALU.
3. Fesili poo ai e ana upu ia ua fai ma tauloto i lenei aso? – IESU

A'OA'OGA:

1. O le ola filemu e le mimita vale, o le agamalu lenei.
2. E fai le malo o le Atua ma nuu o le tagata agamalu ma loto mauualalo
3. Ia fiafia e amio i faataitaiga o tagata o le nuu o le Atua.

PESE: Faalogo ma usitai e leai se isi ala e fiafia ai Iesu pe a faalogo ma usitai.

MANUIA TAPENAGA O LENEI ASO SA

ASO SA – AOKUSO 23, 2026

MATAUPU – “AMUIA E FIA A’AI MA FIA INU I LE AMIOTONU, AUĀ E MAO’ONA I LATOU

TUSI FAITAU: MATAIO 5:6

SINI –Ia malamalama fanau, o e fia inu ma fia a’ai i le amiotonu a le Atua e mao’ona i latou.

FESOASOANI MO LE FAIAOGA: E fa’atalofa atu ia outou susuga i Faiaoga i lenei taeao fou, malo le soifua manuia malo foi le galulue. Taofi, o lo’o faasolo manuia lava tapenaga uma o lenei foi masina amata, o la tatou savaliga o lenei tausaga aoga. E iai le talitonuga, o loo tatou i ai pea i le fa’aauauina o le lauga a Iesu i luga o le mauga. O le ala foi lea ua taumafai ai lava, ina ia ave pea la tatou faamamafa, mo le faatauaina o vaega taitasi o le fa’aamuia a Iesu, ina ia faigofie ai i le fanau ona latou taulotoina. Ia faailoa i le fanau le tāua ma le lelei o le olaga, pe afai e fa’ata’ita’i i ai e tusa o a’oa’oga a Iesu. Fai mai Iesu. ***AMUIA E FIA A’AI MA FIA INU I LE AMIOTONU AUA E MAO’ONA I LATOU.*** E lelei foi ae toe tauloto faatasi mai vaega ia ua uma ona talanoaina, ina ia faatumaui ai pea i loto o fanau le taua o le lauga fa’aamuia a Iesu. Manatu ua na o se amataga foi, e tatala ai la outou sailiiliga mo le tatou lesona o lenei taeao, ae ua taoto atu ia outou susuga i Faiaoga, aua le tapenaga mo lesona a nai fanau. Ia manuia tele tapenaga uma.

FESOASOANI MO LE MATAUPU: Talofa fanau. O a mai outou i lenei taeao fou? O ai sa inu lana ti ma ai lana mea’ai sau ai. Ia lelei tele tatou. Ioe, o le faamaoni lena ma le amiotonu a le Atua i o tatou matua, lea ua mafua ai ona tatou le fia a’ai ma le fia feinu i aso uma ma taimi uma o lo tatou ola. O le tatou lesona o lenei taeao. O loo faaauauina mai lava fa’aamuia a Iesu e tusa o lana lauga i luga o le mauga. ***AMUIA E FIA A’AI MA FIA INU I LE AMIOTONU AUA E MAO’ONA I LATOU.*** O le lolofi ane o le motu o tagata e fia faalogologo ia Iesu, e le fesiligia lava le fia ‘a’ai ma le fia feinu fa’aletino. (meaai ma vaiinu).Ioe fanau, ua silafia lelei lava e Iesu, o le natura ma le vaivaiga numera tasi lea o le tagata, o meaai masani, lea foi tatou te aai ai. E le taumate foi, o le isi lea o mafua’aga e ala ai ona taumulimuli atu isi tagata ia Iesu. Peitai, o le uiga o le saunoaga a Iesu. ***Amuia e fia aai ma fia inu i le amiotonu, aua o le a faatumaui i latou.*** "O le fia ‘ai ma le fia inu" e talanoa i se manaoga ina ia malie i vai ma maona i meaai. O le "amiotonu" e faatatau i le Alii o Iesu Keriso, o la tatou amiotonu. Ina ia tatou faataitai i lona olaga e faamalieina ai i tatou ma maoona ai, aua ua tatou oala i le amiotonu, o Iesu lea. "Amuia i latou o e naunau tele mo le Alii, o Iesu Keriso, aua o le a ia faamalieina o latou agaga." Ioe fanau, o le

faia o le amiotonu e sili atu nai loo le mā'ona i mea'ai fa'aletino. E tāua le amio sa'o, o le tautala sa'o, o le amio ia lelei, ae aua le nanāina se mea e tatau ona fa'ailoa atu. Ua fa'amanuia mai Iesu ia i latou uma, e mafai ona ola i le amiotonu a le Atua. Ia manuia outou le fanau, ma ia faatumuina outou i le amiotonu a le Atua e faavavau.

GALUEGA FAATINO:

1. Tauloto faatasi le faamanuia o lenei aso sa.
2. Faamatala le uiga o le fia ai ma le fia inu faaleagaga.

A'OA'OGA:

1. Aua le naunau i meaai faaletino ae naunau i meaai faaleagaga
2. Aua le nao meaai e vave ai na ma'i
3. Ia ola amio lelei ma fiafia e faataitai ia Iesu.
4. O le faataitai i le olaga o Iesu, o le ola lava lena i le amiotonu ale Atua.

PESE: Faitau le Tusi Paia ma tatalo i aso uma ona e tuputupu ai lea.

MANUIA LE ASO SA

ASO SA – AUKUSO 30, 2026

MATAUPU – MATAUPU FAAMANATU

TUSI FAITAU – MATAIO 5:1-6

SINI – Ia malamalama fanau i le taua o lesona i Aso Sa ua mavae.

FESOASOANI MO LE FAIAOGA: Faatalofa ma ofo-alofa atu ia outou susuga i Faiaoga i le toe Aso Sa o lenei masina, malo le galulue, malo le onosai. Ua tatou taunuu mai i le Aso Sa o le Suega faamanatu mo nai fanau. Ua manatu ai e na o ni nai fesili ma le galuega e vase ane i le laina e nai fanau ua tuuina atu, ae tapena ane e a outou susuga i Faiaoga ni Fesili mo nai fanau. Ia fua lava fesili e tusa ai ma lesona sa outou a'oa'oina o loo outou mafuta. Ia manuia tele tapenaga uma.

FESILI MA TALI

1. O fea na fai ai le lauga a Iesu?
Tali. O luga o le mauga
2. E toafia tagata na auai ma faalogologo i le lauga a Iesu?
Tali. E toatele (motu o tagata)

3. Aisea na o ai tagata i luga o le mauga?

Tali. Na o e faalogologo ia Iesu

4. O le a le uiga o le upu fa'a-amuia?

Tali. O lona uiga o le fa'amanuia

Faatumu avanoa i upu o loo misi i lalo.

amiotonu, agamalu, faamafanafanaina, agaga

1. Amuia e matitiva i le _____. auā e o latou le malo o le lagi

2. Amuia e faanoanoa auā e _____. i latou

3. Amuia e _____. auā e fai mo latou tofi le nuu.

4. Amuia e fia aai ma fia inu i le amiotonu _____. auā e ma'o'ona i latou

E lelei foi ae faaoga ni card boards, e tusi ai le upu i le isi itu ae faaali i fanau le fuaiupu ma le avanoa i le isi itu, ona tali ane lea iai.

MANUIA SUEGA O LENEI ASO SA

ASO SA – SETEMA 06, 2026

MATAUPU: “AMUIA E ALOLOFA ATU, AUA E ALOFAINA MAI I LATOU” (Aso Sa Talalelei)

TUSI FAITAU – MATAIO 5:7

SINI –Ia malamalama fanau i le lelei o le ola alofa atu.

FESOASOANI MO LE FAIAOGA: E faatalofa atu ia outou susuga i Faiaoga. Malo le onosai, faafetai le galulue e tusa ai o le galuega o loo fa'aauau pea. E iai lava le talitonuga e tulaga ese foi lenei taeao, o le taeao o le Aso Sa o le Talalelei. Peitai, o loo iai lava le faamoemoe, e fia faaauauina pea le lauga a Iesu i luga o le mauga, ina ia mafai ona taulotoina e fanau, ma ia manatuaina pea le taua, o le lauga a Iesu. O le Aso Sa o le Talalelei, ua o faatasi ma le tatou lesona. **“Amuia e alolofa atu, aua e alofaina mai i latou”** Ia, o le a taoto atu lava ia outou susuga le tapenaga, ae ua na o se amataga foi e tata'i iai la outou tapenaga o lenei Aso Sa. Ia manuia le Aso Sa o le Talalelei.

FESOASOANI MO LE MATAUPU: Talofa fanau. O ai na te iloaina le Aso Sa lenei. Ioe patipati uma tatou. O le Aso Sa lenei, o le Aso Sa o le Talalelei. O le Aso Sa lenei ua

faamanatuina ai le taunu'u mai o le Talalelei i Samoa. Lelei tele tatou. O ai la e iloa ua fia tausaga talu ona taunuu mai le Talalelei poo le tala ia Iesu i lo tatou atunuu o Samoa? Ioe, lelei tele, o lea ua atoa le 196 tausaga. Ua matua le tala ia Iesu ia i tatou, a tamaiti.? Lelei tele, o le tatou tala la o lenei taeao. O loo faaauauina pea le lauga a Iesu i luga o le mauga. Manatua foi o le vaega lona lima lenei o le fa'aamuia a Iesu, poo lana fa'amanuia, e tusa o ana a'oa'oga mo le motu o tagata. "Amuia e alolofa atu, auā e alofaina mai i latou". E malamalama gofie lona finagalo, afai tatou te alolofa atu i isi tagata, e faapena foi ona alofagia i tatou e tagata. O le uiga lelei lea e tatau mo tagata uma ona latou fa'atinoina. O le alofa e te alofa ai i le isi tagata, o le alofa foi le tali e te maua mai. A e alofa atu, e alofaina mai foi oe e isi tagata. Ua talafeagai foi le tatou mataupu o lenei taeao ma le tala o le Aso Sa o le Talalelei. O le faailoga lelei lava lea mo le tagata ua talia le Talalelei a Iesu, o le tagata ua ola i le alofa.. Ioe, fanau e, taua tele le alofa atu, ia tatou alolofa i nai o tatou matua, aua e sili ona alolofa mai foi i latou ia i tatou uma, e pei o le alofa o le Atua i lana fanau e faavavau. Ia manuia outou le fanau i le alofa o le Atua.

GALUEGA FAATINO:

1. Tauloto faatasi le faaamuia lona lima
2. Saunia ni nai ata e valivali e fanau, pe faamatalaina ai le upu alofa.
- 3.

A'OA'OGA:

1. Ia fiafia e ola alofa i le isi tamaitiiti ua manaomia le fesoasoani.
2. Aua le ola manatu faapito ia te oe lava ma lou aiga..
3. Ia iloa a fiafia e alofa atu, e fiafia foi Iesu i le tamaitiiti faapena.

PESE: Iesu alofa i tamaiti

MANUIA LE ASO SA O LE TALALELEI

ASO SA – SETEMA 13, 2026

MATAUPU – “AMUIA E LOTO MAMĀ, AUA LATOU TE ILOA ATU LE ATUA”

TUSI FAITAU: MATAIO 5:8

SINI: Ia mae'a le mataupu ua malamalama le fanau i le tāua o le loto mama o le tagata.

FESOASOANI MO LE FAIAOGA: E le tu'ua lava le lima o le faatalofa, e ofo-alofa atu ai ia outou susuga i Faiaoga. Malo faafetai le galulue malo le onosai i le galuega. Ia taumafai lava e iloa e tamaiti le lauga a Iesu ma le aogā o ana a'oa'oga mo tatou. Ioe fanau, o se mea lelei lava

lea ia mafai e le tama poo le teine ona manatuaina ma tauloto uma upu o le lauga a Iesu i luga o le mauga. E taua tele le lauga a Iesu, e pei foi o le mataupu o lenei Aso Sa. **“Amuia e loto mama, aua latou te iloa atu le Atua”** O le a taoto atu lava foi ia outou susuga le tapenaga mo le lesona, ae ua na o se amataga lava e tatala ai a outou tapenaga uma mo nai fanau. E lelei lava ona fua i fanau o loo outou mafuta, ina ia faigofie ona malamalama ia tatou tapenaga o lenei Aso Sa. Ia manuia tapenaga uma.

FESOASOANI MO LE MATAUPU: O ai na te manatuaina le tatou tala o le Aso Sa ua mavae atu. Oka! se lelei o tatou! Fai faatasi tamaiti. **“Amuia e alolofa atu, aua e alofaina mai i latou”** Ioe, ia ‘aua lava nei galo lo tatou alolofa atu, aua e alofaina ai i tatou. A’o le Aso Sa la lenei, o lea foi ua tatou faitau ma tauloto le isi fa’aamuia lea a Iesu i lana fanau, pe afai latou te faia ma usitai i ai. **“Amuia e loto mamā, auā latou te iloa atu le Atua”.** O le uiga o lana a’oa’oga i le motu o tagata, fai mai Iesu. Amuia e mamā o latou loto, auā latou te iloa atu le Atua. Ioe fanau, manatua foi o le Atua e silasila i le loto, ae lē vaai i le tino. E tofu lava i tatou ma le loto, ae e manaomia e le Atua le loto e mamā. Afai lava e tatou te maua le loto mamā, o le a mafai lava foi ona tatou iloa atu le Atua e ala i le agaga. E pogisa le vaai i mata faaletino, ae manino le iloa ma le vaai i mata faaleagaga, pe afai e mama le loto o le tagata. E manaia le loto e lelei, aua nei falavelaveina i se mea, a ia faamama le mafaufau ona maua lea o le loto mama. E mafai lava ona vaaia le Atua pe a maua e i tatou le loto lelei ma loto mama, i mea uma tatou te faia. O lona uiga e taua tele le faalogo ma usitai i o tatou matua, aua a faalogo ma usitai, o lona uiga e lelei ma mama le loto. Ioe, ia fai i tatou ma fanau e mama ma lelei le loto, e leai se mea laa ita ai fua i isi tamaiti, o le mafua’aga lena e vevesi ai ma tupu mai ai le misa. Ia fai i tatou ma fanau e faamanuia mai ai le Atua. Fai mai Iesu. **“Amuia e loto mamā, auā latou te iloa atu le Atua”.** Ia manuia tele outou le fanau.

GALUEGA FA’ATINO:

1. Faitau ma tauloto le Autu o lenei aso. **“Amuia e loto mamā, auā latou te iloa atu le Atua”.**
2. Faamatala le uiga o le loto mama. – o le loto e lelei / loto fialia.
3. Saunia le paso e faafefiloai ai ni upu, ae mate e le fanau
- 4 . Taumafai e tusi i ni pepa le faaamuia o lenei taeao.

A’OA’OGA:

1. A fia vaai se tagata i le Atua, e mafai ina ua mama le loto
2. Aua le ita fua i isi tagata ma le palapala o o tatou loto
3. E le fialia le Alii i le loto leaga. (eleelea)

4. Ia fiafia e faataitai i aoaoga a Iesu.

PESE: E lelei, e lelei, e lelei tele le Atua.

MANUIA GALUEGA O LE ASO SA

ASO SA – SETEMA 20, 2026

MATAUPU – “AMUIA E FAATUPUINA LE FILEMU, AUĀ E TA’ŪA I LATOU O ATALI’I O LE ATUA”

TUSI FAITAU: MATAIO 5:9

SINI: Ia malamalama fanau i le tau i maua e le tagata e faatupuina le filemu

FESOASOANI MO LE FAIAOGA: E faatalofa atu ia outou susuga i Faiaoga, i lenei foi aso o a outou suesuega mo le lesona a nai fanau. Fa’amalō le onosa’i, faafetai atu mo mataupu o lo’o fa’aauauina pea, e tusa o le lauga a Iesu i luga o le mauga. Ia faamautūina pea i loto o nai fanau le taua o le a’oa’oina ma lo latou iloa, o vaega eseese o le lauga a le Alii, lea foi ua o’o i ai la tatou tala o lenei Aso Sa. O le fautuaga masani lava, ina ia o faatasi lau tapenaga ma faamasani i le tusi faitau, e faigofie ai le tapenaga. O le mataupu o lenei Aso Sa, o le faaamuia lona fitu lea a Iesu. **“AMUIA E FAATUPUINA LE FILEMU, AUĀ E TA’ŪA I LATOU O ATALI’I O LE ATUA”**. Ua tatou iloa lelei lava o le tagata e faatupuina le filemu, e ta’ua o ia o le atalii o le Atua. Manatu foi ua na o se amataga lava, ae taoto atu ia outou susuga mo le faalauteleina o le lesona o lenei Aso Sa. Ia manuia tapenaga uma.

FESOASOANI MO LE MATAUPU: Talofa tamaiti. O a mai outou i lenei taeao? Ia, ave se pati e viia ai ma faafetaia le alofa o le Atua ia i tatou uma lava. Ua manuia uma i tatou i le filemu o le Atua. Lelei tele. O ai e fiafia e faatupu le filemu i lana vasega, o lona aiga, o ana uo, ma usi tai i ona matua. Oh! lelei tele tatou ahh! O le tatou lesona lena. Fai mai Iesu i lana fa’aamuia lona fitu lea i lana lauga i luga o le mauga. **“Amuia e faatupuina le filemu, auā e ta’ua i latou o atalii o le Atua”** O le mana’o lava o le Alii o Iesu, ia tau solomua lava i tagata ua ta’ua o atalii o le Atua (poo fanau a le Atua), ia aua ne’i fa’amisa pe fa’atupu vevesi. Ia fiafia i le fealofani ma le nonofo lelei, Ua fa’aailoa ma fa’amanatu mai e Iesu, o tatou o fanau a le Atua, e lē tataua ona amataina e tatou se mea leaga ma ni mea fa’aletonu. E tataua lava ona tatou tutū faatasi o tatou o fanau Aoga Aso Sa e tausi le va lelei ma isi tamaiti. O tagata ua ta’ua o fanau a le Atua, e tataua ona faalelei le va o isi tagata o loo faitaga’i pea, ma ia tausia le filemu e pei ona finagalo i ai le

Alii. Fanau, ia fai i tatou ma fanau ma atalii o le Atua, ina ua tatou faatupuina le filemu ma alolofa i soo se tasi. Ia manuia tele outou le fanau, ma ia manatua. O i latou uma o e faatupu le filemu mai le Atua e ta'ua o ana fanau ma ona atalii e faavavau. O ai la e fia fai ma atalii poo le afafine oe Atua.?

GALUEGA FAATINO:

1. Tauloto: “Amuia e fa’atupuina le filemu, aua e taua i latou o atalii o le Atua”
2. Faamatala ma faatino i fanau le galuega o le faatupuina o le filemu.
3. Saunia se lisi, e tau ai i fanau mea e iloa ai le faatupu o le filemu, ma mea e iloa ai le faatupu vevesi.

A’OA’OGA:

1. Aua le ola faamisa.
2. Ia alofa ma fealofani ma isi fanau pei ona manao mai ai Iesu.
3. Ia ola i le filemu ae aua le mimita vale, e tauvalea ai matua ma aiga, nuu ma ekalesia.

PESE: A i ai Iesu i se aiga, o se aiga fiafia

MANUIA TAPENAGA O LE ASO SA

ASO SA – SETEMA 27, 2026

MATAUPU – “MATAUPU FA’AMANATU”

TUSI FAITAU: MATAIO 5:7-9

SINI: Ia fa’amanatu pea le lauga a Iesu e ala i lana fa’aamuia mai, i le lona lima, ono ma le fitu.

FESOASOANI MO LE FAIAOGA: E faatalofa ma ofo-alofa atu ia outou susuga i Faiaoga i le toe Aso Sa foi o lenei masina. Malo faafetai mo galuega lelei o loo faatinoina pea mo nai fanau. E manatu o lenei Aso Sa, e tataua lava ona latou taulotoina le fa’aamuia lona lima, ono ma le fitu. Ia, ae tuu atu le avanoa e tapena ane ai ni nai fesili po’o se isi foi faiga e toe faamanatu ai i nai fanau lesona ua mavae atu. Ia manuia tele tapenaga uma o lenei Aso Sa.

FESILI MA TALI

1. O le a se aoaoga mo le faaamuia lona lima, Amuia e alolofa atu, aua e alofaina mai i latou?
TALI – Ia e ola alofa atu i soo se tasi.

2. O le a le aoaoga na maua mai i le faaamuia lona ono? Amuia e loto mama aua latou te iloa atu le Atua
TALI – Ia mama le loto, poo le loto lelei
3. O le a le aoaoga i le faaamuia lona fitu, Amuia e faatupuina le filemu, aua e taua i latou o atalii o le Atua?
TALI – Aua le ola faamisa. (faamaualuga, fia show)

Fa’auma ane e fanau fuaiupu ia:

Amuia e alolofa atu,----- auā e alofaina ma i latou.

Amuia e loto mama, ----- auā latou te iloa atu le Atua.

Amuia e faatupuina le filemu, ----- auā e ta’ua i latou o atalii o le Atua.

Tusigatala: (3.Fuaiupu) Autu: “Amuia a’u”

MANUIA SUEGA O LENEI ASO SA

OKETOPA - TAPENAGA MA MALOLOGA MOLE ASO SA O TAMAITI.

Ia manuia le Aso Sa o Tamaiti.



Ia manuia tapenaga uma mo le Aso Sa Pa'epa'e o Fanau

MANATU AUTU O NOVEMA: “FA’AAUAU LE LAUGA A IESU I LUGA O LE MAUGA”

ASO SA – NOVEMA 01, 2026

MATAUPU: “AMUIA E SAUĀINA ONA O LE AMIOTONU, AUĀ E O LATOU LE MALO O LE LAGI”

TUSI FAITAU: MATAIO 5:10

SINI: Ia malamalama fanau i le uiga o le sauāina ona o se mea lelei.

FESOASOANI MO LE FAIAOGA: E faatalofa atu ia outou susuga i Faiaoga, malo le onosai ma le faamalolosi i tapenaga uma, sa feagai ma a outou susuga i le aso faapitoa o nai fanau. Manatu o loo manuia lenei taeao, aua o lea foi ua toe amataina la tatou galuega masani i le aoga Aso Sa, ina ua mavae atu tapenaga o le Aso Sa pa'epa'e a le fanau. Ae alo ane loa mo le toe fa'aauauina o le lauga fa'aamuia a Iesu i luga o le mauga. Ua tatou amata i le faaamuia lona valu a Iesu e faapea. “**Amuia e sauaina ona o le amiotonu, aua e o latou le malo o le lagi**” Ua tatou masani i saunoaga nei a Iesu, ma lona toe faamanatu mai mo i tatou i lana lauga i luga o le mauga. Ua iai le manatu e amata atu lava i nai amataga le tatou lesona, ae taoto atru ia outou susuga i Faiaoga mo le faalauteleina mo nai fanau o loo outou mafuta. Ia manuia tele tapenaga uma i le faatasi atu o le Agaga o le Atua ia te outou uma.

FESOASOANI MO LE MATAUPU: Talofa tamaiti. O a mai outou i lenei taeao fou, o lea ua toe amatalia la tatou Aoga Aso Sa e pei ona masani ai. O ai sa matamata i le ata o Iesu lea sa faasatauroina, ma maliu ai. Ioe, ua faasaua tagata o le lalolagi ia Iesu, ae leai sana agasala. O Iesu o le tagata amiotonu, o le tagata lelei ua sauaina fua, ona o lana amiotonu sa ia faaalua i tagata. Ma, sa ia alofa i e sa manaomia se fesoasoani. I le taeao lenei, lea ua tatou oo mai i le fa'aamuia lona valu lea a Iesu i luga o le mauga, lea na ia fa'amanuia mai ai i lana fanau, i le amio e tatau ona ola ai le tagata i aso uma o lona ola. Fai mai Iesu. “**Amuia e sauaina ona o le amiotonu, aua e o latou le malo o le lagi**” O le tagata e mulimuli i le Alii, e le faigofie ona feagai ma isi tagata

auā e le talia gofie e le isi tagata se taumafai atu e faia se mea sa’o ma fai le amiotonu. Auā e feita ai tagata pe a faatonu atu i se mea lelei e ao ona faatino. O le alu i le Alii ma mulimuli ia te ia, o le ola foi lea i se olaga sili atu ona lelei. Aemaise ai, e inosia lava i le faitau a le isi tagata o loo matamata mai, ma lē fiafia i le olaina o le soifuaga e tatau mo le kerisiano. Manatua foi fanau o tatou o tagata Kerisiano, o tatou e tatau ona faia le amiotonu, e fiafia mai ai le Atua ia i tatou uma. O le amiotonu, o lo tatou faia lea o mea sa’o, e le pepelo ma faitogafiti, e le fe’alo’alofa’i, ae faamaoni i le Atua, tusa lava pe feita tagata ma sauaina i tatou. Ae ia tatou manatua fai mai Iesu, e o tatou le malo o le lagi. O lona uiga, pe feita tagata ia te oe ma tatou foi, pe o ane foi sauaina ma fasi oe, ona o lou fiafia i le faamaoni ma faataitatai i le olaga o Iesu, aua e te popole i ai, aua o le iuga, e fai le malo po’o le nuu o le Atua i le lagi, e te nofo ai e faavavau. Ia manuia tele outou le fanau.

GALUEGA FAATINO:

1. Faamasani pea le faitau tusi paia a fanau, e ui ina o loo pupuu atu faitauga.
2. Taumafai e tauloto le mau na faitauina
3. Saunia ni ata o sauaga ma ni ata o tagata e fiafia pea i le sauaina ona o le fiafia i le Atua

A’OA’OGA:

1. Aua le malovale ma faamaualuga i isi tamaiti, aua e le fai le malo o le lagi mo oe, ae vave pe ai lau tv.
2. E lelei le sauaina i le amio lelei ma le tonu, ae leaga le sauaina i le gaoi ma isi uiga leaga ma le mataga.
3. O le sauaina i le amiotonu, o le faia lava lea o le finagalo o le Alii.

PESE: A ia e tau malosi tetee i le fili, aua lava nei e faavaivai.

IA MANUIA TAPENAGA O LENEI ASO SA

ASO SA- NOVEMA 08, 2026

MATAUPU: “AMUIA OUTOU PE A LATOU UPU LEAGA MA FA’ASAUĀ IA TE OUTOU, MA LATOU TU’UA’IINA PEPELO OUTOU I MEA LEAGA UMA ONA O A’U”

TUSI FAITAU: MATAIO 5:11

SINI: Ia malamalama fanau e lē mafaia e tala pepelo ona afaina ai fua le tagata fai mea sao.

FESOASOANI MO LE FAIAOGA: Fa’afeiloai ma faatalofa atu i lenei taeao fou ia outou susuga i Faiaoga, talitonu lava o loo solo lelei pea la tatou galuega faatino mo nai fanau o loo outou mafuta. O loo tatou i ai pea i le lauga a Iesu i le mauga. Ao isi ia o ana saunoaga na lauga atu ai i tagata i luga o le mauga. Lea na ia fetalai atu ai e faapea. **“AMUIA OUTOU PE A LATOU UPU LEAGA MA FA’ASAUĀ IA TE OUTOU, MA LATOU TU’UA’IINA PEPELO OUTOU I MEA LEAGA UMA ONA O A’U.”** Taofi, ua lava tapena foi a outou susuga mo le tatou lesona o lenei taeao, ae ua na o se amataga lava e fesoasoani atu ai, ia outou tapenaga mo lenei Aso Sa. Ia manuia tapenaga uma i le faatasi atu o le Agaga o le Atua ia te outou uma.

FESOASOANI MO LE MATAUPU: Talofa tamaiti. O a mai outou i lenei taeao? Lelei tele tatou. O ai se tamaititi e masani ona tuuaia, pe fai e se isi tamaititi se mea leaga, ae nofo ma ta’u ai fua lou igoa. Ioe, sa’o lelei lava tatou. O le tele o taimi e fefe loa le isi tamaititi, ina ua ia faia se mea sese, nofo loa ma ta’u ai fua lou igoa, ae le o oe na faia le mea sese. A ea. Ia lelei tele, faalogo lelei a tatou. Fai mai Iesu. **“AMUIA OUTOU PE A LATOU UPU LEAGA MA FA’ASAUĀ IA TE OUTOU, MA LATOU TU’UA’IINA PEPELO OUTOU I MEA LEAGA UMA ONA O A’U.”**

O le fa’asoa mai a le Alii, e uiga lava i le tu ma le aga e tatau mo le tagata Kerisiano, lea e iai foi i tatou. O isi tagata e fiafia e faifai upu mai, ma tuuaiina pepelo i tatou, pe a tatou faia ni mea lelei ma mea e finagalo ai le Atua, e tatau ona tatou faia mo isi uso a tagata. E le gata foi i lea latou te tu’ua’ifuaina mea pepelo i isi tagata, ae le o ni mea moni. O le fa’amanatu mai a le Alii, aua le amanaia fua tagata tau fa’aleaga mai ma tagata pepelo, a ia tausisi lava le tagata ia i lana amio ia tonu ma sa’o i le silafaga a le Atua. O le fa’amalosia’u foi lea mo tatou le fanau, ia aua le fiu, ae taumafai pea o tatou olaga, ma ia tauivi pea se ia taunu’u i le manuia ma lelei o le Atua. Aua le popole fua i tala a isi tamaiti, ma a latou tuuaiina pepelo ia i tatou, ae ia tumau ma faamalolosi lava e fai le amiotonu o loo silasila mai le Atua ia i tatou o lana fanau e faavavau.

GALUEGA FAATINO:

1. Fa’aa’oa’o pea ona faaleo taitasi upu o le Tusi Paia.
2. Fa’amalamalama nai upu e le o manino.
3. Ta’u i tamaiti le uiga o le upu “leaga “ – (upu e sa ona tautala ai)
4. Faasoa i nisi auala e faalatele ai le lesona

A’OA’OGA:

1. Aua le tautala pepelo.
2. Aua le faia upu e sã ona tautala ai.

PESE: Ou te fia alu i le a’oga Aso Sa

*Oute fia alu le a'oga Aso Sa, e pepese ma vivi'i i le Tamā
Oute fia alu le a'oga Aso Sa, e fa'alogo i le tala ia Iesu
Fiu satani e fa'aosooso mai, e sikipi le a'oga Aso Sa
Na ou tulia i fafo ma ou fai i ai – E PULE IESU IA TE A"U*

MANUIA GALUEGA O LENEI ASO SA

ASO SA – NOVEMA 15, 2026

**MATAUPU: “IA OUTOU OLIOLI MA FIAFIA LAVA, AUĀ O I LE LAGI LO OUTOU
TAUI E TELE.”**

TUSI FAITAU: MATAIO 5:12

SINI: Ia malamalama fanau e maua le fiafia ma le olioli mai le Alii pe afai e onosai le tagata.

FESOASOANI MO LE FAIAOGA: Faatalofa atu ia outou susuga i Faiaoga. Malo le onosai, malo foi le faapalepale. O lea lava o loo fa'aauau pea nisi o saunoaga ma upu o le lauga a Iesu i luga o le mauga. E manatu o loo ia te outou lava le faasoa lelei ma le fetau mo nai fanau o loo outou mafuta pea, mo le faatinoina o le mataupu. Taofi foi, ia faatauaina pea le a'oa'oina o le fanau ina ia taulotoina pea ni vaega o le lauga a Iesu i luga o le mauga. Ia fa'amatala lava le lesona e tusa o le tusi faitau ua aumai mo i tatou. O le tatou lesona o lenei taeao. **“IA OUTOU OLIOLI MA FIAFIA LAVA, AUĀ O I LE LAGI LO OUTOU TAUI E TELE.”** manaia foi, ae tatala lava i ni nai pesepesega e faatatau i le lesona, e pei o le pese. Olioli i le Alii o lo'u malosi lea. A ma'ea ona faailoa loa lea o le lesona mo lenei Aso Sa. Ia manuia tele a outou tapenaga uma mo le lesona a le fanau.

FESOASOANI MO LE MATAUPU: Talofa tamaiti. O a mai outou i lenei taeao, o le Aso Sa pa'ia o le Alii. Lelei tele tatou. Tatou tutu faatasi uma i luga. (Usu le pese) Olioli i le Alii o lo'u malosi lea.....(ma'ea alala i lalo) Patipati uma tatou. Lelei tele outou le fanau. Fai mai upu o le pese. Olioli i le Alii, o lo tatou malosi lea. O lona uiga a olioli ma fiafia le tagata i le Alii, e faatuputeleina lona malosi faaleagaga. Ioe, o le uiga foi lea o le tatou lesona o lenei Aso Sa. **“IA OUTOU OLIOLI MA FIAFIA LAVA, AUĀ O I LE LAGI LO OUTOU TAUI E TELE.”** O loo fa'atāua pea i a'oa'oga a le Alii o Iesu, ia aua lava nei afaina le loto o le tagata i mea e tutupu o le olaga, a ia maua pea le ola onosai ma le fa'apalepale. O ana apoapoa'iga e luitau ai le ola saisaitia o le tagata, ina ia aua nei toilalo gofie ai i lea aso ma lea aso, a ia mautu pea le loto fiafia ma le olioli i le Alii. o tatou tagata e tigaina nei, ae mulimuli ane tatou te fiafia taeao. O le faamanuiaga ua ia

folafola mai e maua e le tagata e lē vaivai gofie, ae malosi le loto e tumau pea i le Alii ma ana a’oa’oga. O le i’uga o lea tagata, na te maua le fiafia ma le olioli mai i le Alii o Iesu e faavavau. Ia manuia tele outou le fanau, ia outou tumau i le fiafia ma le olioli i le Alii, aua o loo i le lagi lo outou tau i e tele.

GALUEGA FA’ATINO:

1. Fatino e ni teine se toalua le uiga o le upu, fiafia ma le faanoanoa.
2. Faamalamalama le upu olioli ma le fiafia
3. Olioli ma le fiafia o le mea lava e tasi ae o le loto ua faagaetia ma le mafau fau ua le toe mamafa i se mea. (Olioli: fiafia umi. Fiafia: fiafia pu’upu’u

A’OA’OGA:

1. Ia ola fiafia, aua le faanoanoa
2. Ia tumau i le fiafia ma le olioli mai le Alii ma ia maua le onosai.

PESE: Ou te tumau ma pipii mau

Oute tumau ma pipi’i mau, oute tumau ma pipi’i mau

Ti’apolo taumafai e liliu ese a’u, oute tumau ma pipi’i mau

A ia e tau, malosi, tete’e i le fili

Aua lava nei e fa’avaivai

A ia e tau mo le Alii o ‘au, e aoga tutumau

MANUIA GALUEGA O LENEI ASO SA

ASO SA – NOVEMA 22, 2026

MATAUPU: “IA FA’APEA ONA PUPULA ATU LO OUTOU MALAMALAMA I LUMA O TAGATA”.

TUSI FAITAU: MATAIO 5:16

SINI: Ia iloa ma malamalama fanau i le taua o le amio lelei, auā e fiafia ai le Atua ma tagata.

FESOASOANI MO LE FAIAOGA: Faafeiloai ma faatalofa atu ia outou susuga i Faiaoga.

Malo faafetai le galulue, malo le onosai ma le tauata’i i lo tatou valaauina mo nai fanau a le ekalesia ma le nuu. O le ola i aso uma o loo aumaia ai le fa’atonuga mai le Alii, mo i latou ua iloa ma talitonu faatuatua ia te Ia. manatu ai ua o gatasi ma le tatou lesona o lenei Aso Sa. “IA FA’APEA ONA PUPULA ATU LO OUTOU MALAMALAMA I LUMA O TAGATA” Manatu ia iloa ma malamalama pea le fanau, i le manaia o le ola amio lelei, e pupula atu ai lo latou malamalama i

luma o tagata. Taofi lava, ua na o se amataga lava e tatala ai a outou tapenaga, ae ia saunia pea a outou susuga mo le lesone a nai fanau mo lenei Aso Sa. O fautuaga masani lava, ina ia tapena ane lesone e fetau lelei ma nai fanau o loo outou mafuta, ina ia faigofie ona malamalama ai. Ia faamanuia atu le Atua ia outou tapenaga uma o le a feagai ai.

FESOASOANI MO LE MATAUPU: Talofa tamaiti. Patipati uma tatou, lelei tele. O ai na te manatuaina le tatou lesone i le Aso Sa ua tuanai atu. Ioe fai faatasi. **“IA OUTOU OLIOLI MA FIAFIA LAVA, AUĀ O I LE LAGI LO OUTOU TAU E TELE.”** lelei tele tatou. O le lesone la a tatou i lenei taeao. **“IA FA’APEA ONA PUPULA ATU LO OUTOU MALAMALAMA I LUMA O TAGATA”** O le isi lea manao e tusa o le a’oa’o mai o le Alii, ina ia mafai lava ona iloa e tagata uma le amio a le tagata ua a’oa’oina lelei. O le fa’asoa mai a le Alii, ina ia aua lava nei natia i lalo le mea lelei, ae sili ai lava le amio mamā ma le amio lelei e manaomia pea ona faasusulu atu, ina ia mafai ona iloa ma aogā mo tagata uma. O le mea lea e taua ai mo i tatou uma, le ola i se olaga lelei aua e fai ma faataitaiga i isi tagata. O le finagalo foi lea o Iesu, ia avea i tatou ma malamala e susulu atu mo soo se tasi o loo nofo pea i le pogisa. Fai mai le Autu o le tatou lesone. **“IA FA’APEA ONA PUPULA ATU LO OUTOU MALAMALAMA I LUMA O TAGATA”** fanau, ia fai i tatou ma faataitaiga lelei o lau amio lelei, o lau amio lelei e sili ona fia faataitai mai iai isi o tatou uso ma isi tamaiti e le usitai ma faalogo i o latou matua. A lelei a tatou amio, ona fai lea o tatou ma malamalama e pupula atu i luma o tagata. Ia manuia tele outou le fanau, ia fai outou ma malamalama i luma o tagata e faavavau.

GALUEGA FA’ATINO:

1. Ia faatalanoa uiga faafeagai o upu,- malamalama - pogisa.
2. Faamalamalama le uiga o upu. Pei o le upu lea malamalama- amio, pupula – faailoa atu , pe faasusulu atu.
3. Saunia ni igoa o le tusi paia e tusi e fanau.

A’OA’OGA:

1. Ia ola i le amio lelei
2. Faasoa atu le malamalama mo isi

PESE: 363 – Ia susulu atu mo i tatou

IA FAATASI LE AGAGA O LE ATUA I LE GALUEGA

ASO SA – NOVEMA 29, 2026

MATAUPU FA'AMANATU

TUSI FAITAU – MATAIO 5:10-16

SINI: Ia fa'amanatu ma fa'ailoa mataupu ua tuana'i.

FESOASOANI MO LE FAIAOGA: O le Faatalofa masani lava ia outou susuga i Faiaoga.

Malo le taupati malo foi le tauasa. Talitonu o loo manuia pea le gasologa o galuega o lenei masina. O lenei Aso Sa o mataupu faamanatu ina ia toe polili atili ai nai mataupu ua tuana'i atu. Ia, ua taoto atu lava le suega ma le faamanatu i le faiga ua outou manatu e lelei, e faamanatu ai lesonea o lenei masina. Ae ua na o nai fesili ia e fesoasoani ai ia outou tapenaga o lenei Aso Sa. Ia manuia tele tapenaga uma i le faatasi atu o le Agaga Paia o le Atua ia te outou uma.

FESILI MA TALI – FA'ATUMU LE AVANOA.

Upu e faatumu ai le avanoa: auā, ona, outou, luma.

1. Amuia e sauāina ona o le amiotonu, _____ e o latou le malo o le lagi.
2. Amuia i latou pe a latou upu leaga, ma fa'asauā ia te outou ma latou tuuaina pepelo outou, i mea leaga uma _____ o a'u.
3. Ia outou olioli ma fiafia lava, auā oi le lagi lo _____ tau'i e tele.
4. Ia faapea ona pupula atu lo outou malamalama i _____ o tagata.
5. O ai na faalogo i le lauga a Iesu i luga o le mauga?

Tali: O le motu o tagata.

6. O le a le fa'amoemoe o le lauga a Iesu i luga o le mauga?

Tali: Ia sui ai le amio a le tagata, ma faapaiaina ai.

7. E fia fa'aamuia a Iesu i lana lauga e pei ona a'oa'o mai i masina e lua ua tuana'i?

Tali: E valu ana fa'aamuia, fa'atasi ai ma isi upu o lana lauga

MANUIA SUEGA O LENEI ASO SA

TAPENAGA O LE ETIVENI

ASO SA- TESEMA 06, 2026

MATAUPU – FA’AOLATAGA A LE ATUA I LE LALOLAGI.

TUSI FAITAU – Ioane 3 : 16 - 17

SINI: Ia malamalama fanau o Iesu na ia fa’aolaina le lalolagi e ala i lona soifua paia.

FESOASOANI MO LE FAIAOGA: Faatalofa ma ofo-alofa atu ia outou susuga i Faiaoga.

Taofi o lea ua tatou oo mai i le toe masina o lenei tausaga. Malo le onosai, i galuega ma feau o lenei faiaoga ua mavae atu, e iai lava le talitonuga o loo maua pea le malosia ma le fa’apalepale e tusa o galuega fita o lo’o outou feagai ai i le Aoga Aso Sa o lenei tausaga. O le agaga faafetai lava e le uma ona o lea fo’i ua latalata atu i le fa’ai’uina o tiute ma faiva, aemaise o galuega o lenei tausaga 2026. O le masina taua foi lenei i le Kalena a le ‘Au-kerisiano, o loo tatou faamanatuina faatasi ai le taua o lenei foi Aso Sa muamua o le Etiveni. O le faatalitali atu i le soifua mai o le Mesia na valoia. Manatu foi ua na o se amataga lava e amata ai a outou tapenaga, ae tatou atu lava ia outou susuga ia tautuana pea a outou tapenaga e faigofie mo mataupu ta’itasi. Ia faigofie i fanau o loo outou mafuta ona malamalama ia tatou lesona o loo faamatalaina. Ia faamanuia atu le Atua i tapenaga uma.

FESOASOANI MO LE MATAUPU: Talofa tamaiti. O a mai outou i lenei taeao fou. O ai se isi na te iloa le masina lenei ma se mea e tupu ai. Ioe, lelei tele tatou. O le masina lenei lea e sauni ai i tatou i le Kerisimasi. O lona uiga o le a fanau mai mo i tatou le pepe o le Kerisimasi. Peitai, e le’i oo atu tatou i le kerisimasi, ae ua tatou taunuu mai i le masina mulimuli o le Tausaga 2026. O le tatou lesona la o le taeao lenei **FA’AOLATAGA A LE ATUA I LE LALOLAGI**. O le atoaga lea o le tala lelei ma le fa’aolataga mo le lalolagi, lea o loo aumaia e le tusi faitau o lenei aso. O le molimau lea a Ioane na ia fa’aailoa ai i tagata kerisiano o loo feagai pea ma mea faigata ona o le malosia o pulega a le malo o Roma. Manatua foi o le taimi o le malo o Roma lea sa feagai ai Iesu ma ona puapuaga. O Iesu na Afio mai e aumai le faaolataga a le Atua i le lalolagi. A o le vaega lea ua leva ona valoia mai, o se tasi na te fa’aeaina le nuu, ma faaolaina i latou mai le nofo pologa pea i sauaga, ma le soifua olopalaina. O le alofa o le Atua ua tino mai, e ala i lona lava Alo pele o Iesu Keriso, ua foaina mai ina ia fa’aolaina le lalolagi ia te Ia. Ioe fanau, o le Afio mai o Iesu, na ia sau e laveai ma faaolaina i tatou uma ma le lalolagi atoa ona ua agasala le lalolagi. O Iesu o Ia lava o lo tatou Faaola, e na te laveai i tatou mai fita ma faigata e tatou te feagai ai. Ia

tatou faatuatua ma talitonu, o Ia lava o lo tatou Alii ma lo tatou Faaola e toatasi. Ia manuia tele outou le fanau, ia tumau lo tatou faatuatua ma talitonu i le Atua e faavavau.

GALUEGA FA'ATINO:

1. Ia tofi se tasi na te tauloto mai le mau
2. Faamalamalama upu o le faitauga
3. Vaevae i silapela upu e faigofie ai, FAATUATUA, ALOFA, LALOLAGI.

TAULOTO: *Aua ua faapea lava ona alofa mai o le Atua i le lalolagi ua ia aumai ai lona atalii e totasi, ina ia le fano se tasi e faatuatua ia te ia a ia maua e ia le ola e faavavau,*

PESE: Le alofa o le Atua e ofoofogia

A'OA'OGA:

1. Ia tumau i le ola talitonu ma faatuatua i le Atua
2. Talia ma le agaga fialia le meaalofa a le Atua ua foai mai

IA MANUIA LE ASO SA O LE ETIVENI

ASO SA – TESEMA 13 , 2026

MATAUPU: OLE FANAU MAI O LE FAAOLA

TUSI FAITAU: MATAIO 2: 1 - 6

SINI: Ia latou malamalama o Iesu ua fanau mai mo le lalolagi

FESOASOANI MO LE FAIAOGA: E faatalofa ma faafeiloai atu ia outou susuga i Faiaoga i lenei taeao pa'ia o le Aso Sa o le Alii. Malo le tauasa malo foi le tauata'i i feau ma galuega o lenei tausaga. E fialia lava e fa'aailoa atu le agaga faafetai ona o le galuega tele sa fitaituga ai a outou susuga i Faiaoga i lenei tausaga atoa. O le upu moni lava e le atoa pea se taumafai atu e ala i tusitusiga, ae manatu lava ua na o se taiala lava e fesoasoani atu ai i mataupu taitasi. Ae o le a seu ia i fanua se taumafai atu e tusa o galuega o lenei tausaga, ma le talitonuga lava, o loo ia te outou lava le aoao tetele o le faatinoina o le galuega. E manatu lava o tatou o ni auauna lē aoga, ae taumafai lava i se mea e gata ai le mafai ma le faamoemoe pea i le Alii o le matai ia o le galuega ma lo outou valaauina. O le toe lesona lenei o le tatou Aoga Aso Sa ona tatou faamavae atu lea ma faiva faa-faiaoga aso sa, o lenei foi tausaga. Saga'i ane loa e faatili foe mo le a'e i

fanua. O le tatou lesona o lenei taeao. **O LE FANAU MAI O LE FAAOLA.** E foliga o se tala masani, i la outou faafofoga, ae taofi ia lava tapena pea a outou susuga i le faamatalaina o le tatou lesona mo nai fanau. Ua na o se amataga foi, e taoto atu ia outou le atoa mo le lesona o lenei Aso Sa. Ia manuia tapenaga uma.

FESOASOANI MO LE MATAUPU: Talofa tamaiti. O a mai outou le fanau, ua ou vaai atu ua fiafia uma tatou a. Lelei tele. O le toe Aso Sa lenei o le tatou Aoga Aso Sa, ona tatou malolo ai lea mo le malologa puupuu, ona tatou toe a'e mai ai lea mo le Tausaga Fou 2027 i le alofa o le Atua. O le tatou lesona o lenei taeao. **"O LE FANAU MAI O LE FAAOLA"** Manatua foi fanau, o lea ua tatou sauni e faatali le fanau mai o le pepe o le Kerisimasi o lenei tausaga. A o le taua lea o le le fa'asoa mai a le tusi tala mo le fa'aolaina o le nuu, na fa'amanino mai ai, le ala na afio mai ai Keriso i le lalolagi, ina ia fa'aolaina tagata uma ia te ia. O le atoaga lea o le tala lelei, o le pine fa'amaui foi lea, ma le fa'aailoga mo le faaolaina o tagata uma e aafia atu ai ma tatou. O le afio mai la o le Alii, e ala i le pepe fou o le a fanau mai, o le faamoemoe autu lea mo le lalolagi agasala. O lenei vaitau ua sauni atu ai, le 'au-kerisiano uma mo le fanau mai o le Fa'aola o le lalolagi uma. Pau lava la tatou galuega e fai, ia tatou talia ma le fiafia le Faaolataga e ala i le fa'atuatua ma le talitonu moni ia te Ia. Aua o Ia lava o le Mesia na valoia o le a fanau mai mo i tatou ma le lalolagi atoa. Ia sauni sau meaalofa, ma ia tapena ma le loto fiafia o tatou loto ma agaga e faatali atu ai le pepe o le a fanau mai. O Iesu le Mesia mo i tatou ma le lalolagi uma. Ia manuia tele outou le fanau. Ia manuia le kerisimasi ma le Tausaga Fou i le alofa ma le agalelei o le Faaola o le a fanau mai.

GALUEGA FAATINO:

1. Ia faitau faatasi le Tusi Paia
2. Fesoasoani i ni upu e le o manino
3. Fa'amatala lenei vaitau ua oo i ai, o le faamanatuina o le fanau mai o Iesu

A'OA'OGA:

1. Talia fiafia le fanau mai o le pepe o Iesu
2. Talitonu pea ma faatuatua i le Faaola
3. Faafetai ona o le alofa mai o le Atua i le lalolagi.

PESE: Go tell it on the Mountain.

Over the hills and everywhere.

Go tell it on the mountain that Jesus Christ is born.

IA MANUIA LE ALO ATU I ASO FIAFIA.
